

K L E M M O U
GREG AL LOUNKER

I

An dud iaouank pa zimezont
Gilic ar vervèro !
Ne ouzont ket petra reont
Gili vertonti ! Gili vertonton !
Gilic ar vervèro !
Daoulagad ar c'huil dêro !!

II

Me zonje dinn 'r vech dimezet
Ne mijé great netra ebed.

III

Pedal e rankan ober tout :
Ober crampouez ag aoza ioud !

IV

Ag ar pez a zo goasoc'h c'hoas,
Eo pilad land gant va zreid noas !!

V

Me zo dimezet d'eun ever gwin
A ia d'an davarn bep mintin ;

VI

Ar gwin a ev leiz e veren
N'eo ket gwin ruz mes gwin melen !!

VII

D'an davarn e za mintin mad,
D'ar gear e teu goall divezad ;

VIII

Neuze 'commans al langachou,
Ar rebechou, ar bac'hadou !

IX

Ne glevan mui nemed : kea kuit,
An ti zo dinn, ar meaz zo did !!

X

Tud iaouank, abarz dimezi,
Klozit eul liorz e tal o ti.

XI

C'houi lakaï enhan bep eil tro,
Goude 'n eured tri bod c'huero !!

XII

Bod nec'h a ziou, bod klemm a gleiz,
Ha bod ran-galoun en ho c'hreiz.

XIII

Tro vardo greun pasianted,
Ha mont aliez d'ho gueled !

XIV

Setu va zoun ; breman, va zud,
Hervez ho c'hoant choazit ho klud.

• AN DAOU VAOUT •

I

Maout ar Go ha maout ar Gall
En em dourtas en deiz all.
Hag e lavare ar Go :
« Sell va maout penaos e sko ! »
Hag ar Gall a lavare :
« Sel penaoz va hini-me ! »

II

« Maout, dalc'h mad, eme ar Gall
» Maout ar Go a ia da fall. »
« Maout, dalc'h mad, eme ar Go,
« Maout ar Gall did en em ro. »
Hag an eil ouz egile
An daou zot en em ganne.